

四庫全書

子部

欽定四庫全書

子部

西山讀書記卷六

詳校官中書臣孫球

刑部郎中臣許兆椿覆勘

總校官庶吉士臣侍朝

校對官庶吉士臣何思鈞

謄錄監生臣劉垠

欽定四庫全書

西山讀書記卷六

宋真德秀撰

仁

書仲虺之誥曰克寬克仁彰信兆民

此稱湯之辭

伊尹曰民罔常懷懷于有仁

此告太甲之辭六經言仁始於此虞書所謂好生之

德安民則惠即仁也而未有仁之名至是而名始著
大抵言仁之用至孔子而後言仁之體

復六二象曰休復之吉以下仁也

程子曰為復之休美而吉者以其能下仁也仁者天
下之公善之本也初復於仁二能親而下之是以吉
也○朱子曰伊川語錄中說仁者以天地萬物為一
體說得太寬無捉摸處易傳只云四德之元猶五常
之仁偏言則一事專言則包四者又云仁者天下之

公善之本也易傳只此兩處說仁極平正確實學者且當玩此此是程子手筆也○李守約曰天下之公是無一毫私心善之本是萬善從此出

論語有子曰君子務本本立而道生孝弟也者其為仁之本與

朱子曰務專力也本猶根也仁者愛之理心之德也為仁猶曰行仁與者疑詞謙退不敢質言也○程子曰德有本本立則其道充大孝弟行於家而後仁愛

及於物所謂親親而仁民也故為仁以孝弟為本論性則以仁為孝弟之本或問孝弟為仁之本此是由孝弟可以至仁否曰非也謂行仁自孝弟始孝弟是仁之一事謂之行仁之本則可謂是仁之本則不可蓋仁是性也孝弟是用也性中只有箇仁義禮智四者而已曷嘗有孝弟來然仁主於愛愛莫大於愛親故曰孝弟也者其為仁之本與○集義明道先生曰孝弟本其所以生乃為仁之本或問為仁先從愛物

推如何伊川先生曰不愛其親而愛他人者謂之悖
德不敬其親而敬他人者謂之悖禮故君子親親而
仁民仁民而愛物能親親豈不能仁民能仁民豈不
能愛物仁民而推親親墨子也○或問仁何以為愛
之理也曰人稟五行之秀以生故其為心也未發則
具仁義禮智信之性以為之體已發則有惻隱羞惡
恭敬是非誠實之情以為之用蓋木神曰仁則愛之
理也而其發為惻隱火神曰禮則敬之理也而其發

為恭讓金神曰義則宜之理也而其發為羞惡水神
曰智則別之理也而其發為是非土神曰信則實有
之理也而其發為忠信是皆天理之固然人心之所
以為妙也仁之所以為愛之理於此其可推矣或曰
仁為愛之理矣又以為心之德何哉曰仁之道大不
可以一言而盡也程子論乾四德之元猶五常之仁
偏言則一事專言則包四者推此而言則可見矣蓋
仁者五常之首而包四者惻隱之體也而貫四端故

仁之為義偏言之則曰愛之理此章孝弟為仁之本是也專言之則曰心之德下章所謂巧言令色鮮矣仁是也其實愛之理所以為心之德是以聖門之學必以求仁為要而語其所以行之者則必以孝弟為先論其所以賊之者則必以巧言令色為甚記語者所以列二章於首章之次而其序又如此欲學者知仁為急而識其所當務與其所可戒也曰程子以孝弟為行仁之本而又曰論性則以仁為孝弟之本何

也曰仁之為性愛之理也其見於用則事親從兄仁
民愛物皆其為之之事也此論性而以仁為孝弟之
本者然也但親者我之所自出兄者同出而先我故
事親而孝從兄而弟乃愛之先見而尤切若君子以
此為務而力行之至於行成而德立則自親親而仁
民自仁民而愛物其愛有差等其施有漸次而為仁
之道生生而不窮矣此孝弟所以為行仁之本也曰
然則所謂性中但有仁義禮智而無孝弟者又何耶

曰此亦以為自性而言則始有四者之名而未有孝弟之目耳非謂孝弟之理不本於性而生於外也曰然則禮義智信為之亦有本耶曰有請問之曰亦孝弟而已矣但以愛親而言則為仁之本也其順乎親則為義之本也敬乎親者則為禮之本也其知此者則為智之本也其誠此者則為信之本也蓋人之所以為五常百行之本無不在此孟子之論仁義禮智樂之實者正為是爾此其所以為至德要道也歟○

引程子云云譬如一粒粟生出為苗仁是粟孝弟是苗便是仁為孝弟之本又如木有根有幹有枝有葉親親是根仁民是幹愛物是枝葉便是行仁以孝弟為本○性中只有仁義禮智四者仁便包攝孝弟在其中但未發出來未有孝弟之名耳非孝弟與仁各是一物性中只有仁而無孝弟也仁所包攝不止孝弟凡慈愛之屬皆所包也○伊川云為仁以孝弟為本事之本守之本之類是也論性以仁為孝弟之本

天下之大本之類是也。○黃氏曰先師嘗言二程子之解釋經義非諸儒所能及程伯子曰孝弟本其所以生乃為仁之本此語最深切蓋推原孝弟之理本於父母之所以生所以為行仁之本也或曰仁者愛之理心之德先師言之詳矣而學者未之能曉也曰仁性也既曰愛又曰心何也天地之大德曰生天地之所以為德語其全體而極其大用不過曰生而已生之外無他道也天地以是為心而人得天地之心

以為心故其所以為仁者愛是也仁固主於愛然人之一心有仁有義有禮有智其所以為德者非一然仁包四德而貫四端則凡吾心之全德莫非仁也論仁之所專主而至切者則曰愛論仁之所兼統而至廣者則曰心不若是不足以盡其義也曰愛矣而又曰愛之理心矣而又曰心之德何也曰愛自是情仁自是性程子言之矣愛非所以言仁也曰愛之理則是仁者乃愛之理而非愛也蓋指性而言也合性與

知覺有心之名張子言之矣言心則合性知覺而言
曰心之德則專指此心所得之理所謂性也而凡所
具之理皆在其中矣既曰愛之理心之德則釐而為
二矣又曰其實愛之理所以為心之德何也曰論其
專主而至切者固曰愛之理然其兼統而至廣者亦
豈離乎愛之理哉故春者生意之生也夏者生意之
長也秋者生意之斂也冬者生意之藏也蓋無適而
非生意也方其靜也則一生意足以包四德及其動

也則一生意足以貫四端則愛之理心之德又豈有
二事哉但別而言之庶其部分位置截然不亂又合
而言之使其倫理脈絡渾然無間是則先師之意也
孔門教人莫切於求仁歷代諸儒推明其義卒無至
當之論自程子一為主一事包四者之言而先師立
愛之理心之德六字以斷之而又一離一合以極其
指歸使天命人心之奧聖賢典訓之微一旦粲然大
明其功豈可量哉

子曰巧言令色鮮矣仁

朱子曰巧好令善也好其言善其色致飾於外務以悅人則人欲肆而本心之德亡矣聖人詞不迫切專言鮮則絕無可知○程子曰知巧言令色之非仁則知仁矣○或問辭欲巧令儀令色何以異於此章所謂巧言令色乎曰為己為人之不同而已意誠在於為己則容貌辭氣之間無非持養用力之地一有意於為人而求其說已則心失其正而鮮仁矣○只馳

心於外便是不仁。○南軒張氏曰：此所謂巧言令色，欲以悅人之觀聽者，其心如之何？故為鮮矣。仁或曰：君子之於言色，未嘗有所苟也。則闕君子之修

身，謹於言辭容色之間，乃所以體察在己之實事，是求仁之要也。

子曰：人而不仁，如禮何？人而不仁，如樂何？

游氏曰：人而不仁，則人心亡矣。其如禮樂何哉？言雖欲用之，而禮樂不為之用也。程子曰：仁者天下之正

理失正理則無序而不和○李氏曰禮樂待人而後
行苟非其人則雖玉帛交錯鐘鼓鏗鏘亦將如之何
哉○問禮樂不為用是如何曰不仁之人渾是一團
私意自不奈禮樂何禮樂須是中和溫厚底人方行
得若不仁之人與禮樂不相關安得為之用○中心
斯須不和不樂則鄙詐之心入之外貌斯須不莊不
敬則慢易之心失之既不和樂不莊敬如何行得禮
樂○問游氏之說則指在外禮樂言之如玉帛鐘鼓

之類程子所謂無序不和則主在內者言之如何曰
兩說只是一意在我者既無序而不和在外之禮樂
亦不為我用○問仁者心之德也不仁之人心德既
亡方寸之中絕無天理平日運量酌酢盡是非僻邪
淫之氣無復本心之正如此等人雖周旋於玉帛鐘
鼓之間其於禮樂判為二物其如禮樂何先生曰然
南軒曰此聖人使人知禮樂之原也不仁之人雖欲
為禮樂其如禮樂何蓋是心存而後敬與和生無禮

樂之所由興也

子曰里仁為美擇不處仁焉得知

朱子曰里有仁厚之俗為美擇里而不居於是焉則失其是非之本心而不得為知矣○謝氏曰孟子因擇術嘗引此矣故繼之曰夫仁天之尊爵也人之安宅也莫之禦而不仁是不智也今當以此論為證問謝氏之說如何朱子曰聖人本語只是說居必擇鄉游必擇士之意○南軒曰里居也里仁為美言人以

居仁為美也人以居仁為美苟不知擇而處焉是不智也擇而處之乃利仁之事然處之之久則將安之矣愚按三先生之說不同正當叅繹

子曰不仁者不可以久處約不可以長處樂仁者安仁知者利仁

朱子曰約窮困也利猶貪也蓋深知篤好而必欲得之者也不仁之人失其本心久約必濫久樂必淫惟仁者則安其仁而無適不然知者則利於仁而不易

所守蓋雖深淺之不同然皆非外物所能奪矣。○謝氏曰仁者心無內外遠近精粗之間非有所存而自不亡非有所理而自不亂如目視而耳聽手持而足行也知者謂之有所見則可謂之有所得則未可有所存斯不亡有所理斯不亂未能無意也安仁則一利仁則二安仁者非顏閔以上去聖人為不遠不知此味也諸子雖有卓越之才謂之見道不惑則可然未免於利之也。○先生再三誦安仁則一利仁則二

之語以為解中未有及此者因歎云此公見識直是高。問利仁莫是南軒所謂有所為而為者否曰有所為而為不是好底與知者利仁不同。仁者溫厚篤實義理自然充足不待思而為之而所為皆是義理其心常怡怡地所謂仁也知者知有是非而取正於義理以求其是而去其非所謂智也。安仁者不知有仁如腰之忘帶足之忘履利仁者是見得就之則利去之則害。非顏閔以上不知此味到顏閔地位

知得此味猶未到安處也。○南軒曰自非上智生知之流則利仁之事正所當用力爾

子曰唯仁者能好人能惡人

朱子曰惟之為言獨也蓋無私心然後好惡當於理
程子所謂得其公正者是也。○游氏曰好善而惡惡
天下之同情然人每失其正者心有所繫而不能自
克也惟仁者無私心所以能好惡也。○公正字相少
不得公是心裏公正是好惡當理

子曰苟志於仁矣無惡也

朱子曰苟誠也志者心之所之也其心誠在於仁則必無為惡之事矣○楊氏曰苟志於仁未必無過舉也然而為惡則無矣○或問或以惡字為去聲為志於仁無所嫉惡如何曰上章適言惟仁者能好人能惡人則仁人曷嘗無所好惡哉今日無惡然則謂其獨有所好可乎故胡氏力排其說以為貪無惡之美名失仁人之公道非知仁者蓋得之矣然此又有說

焉蓋仁固公矣而主於愛故仁者於物之當好者則欣然悅而好之有所不得不惡者則惻然不得已而惡之是以好惡各當其物而愛之理未嘗不行乎好惡之間也以此而觀則胡氏之言其亦未免於偏與

○先生問學者苟志於仁矣無惡也與士志於道而恥惡衣惡食者未足與議也前言志於仁則無惡後言志於道而猶有此病其志則一而其病不同如何

諸生言不合先生曰仁是最切身底道理志於仁大

段是親切做工夫底所以為無惡志於道則說得來
濶凡人有心向學皆志於道也若雖有志而泛泛不
切則未必不為外物所動○南軒曰志於仁則無不
善蓋元者善之長志乎此則何惡之有

子曰富與貴是人之所以欲也不以其道得之不處也貧
與賤是人之所以惡也不以其道得之不去也

朱子曰不以其道得之謂不當得而得之然於富貴
則不處於貧賤則不去君子之審富貴而安貧賤也

如此

君子去仁惡乎成名

言君子所以為君子以其仁也若貪富貴而厭貧賤則是自離其仁而無君子之實矣何所成其名乎

君子無終食之間違仁造次必於是顛沛必於是

終食者一飯之頃造次急遽苟且之時顛沛傾覆流離之際蓋君子之不去乎仁如此不但富貴貧賤取舍之間而已也○言君子之為仁自富貴貧賤取舍

之間以至於終食造次顛沛之頃無時無處而不用其力也然取舍之分明然後存養之功密存養之功密則其取舍之分益明矣○去仁如孟子去齊之去我元有此仁而自離去之也○富貴貧賤方是就粗處說終食不違以後方說得細密然不先立得粗的根脚後面許多細密工夫更無安頓處須是先能於富貴不處於貧賤不去方可說上至細處去若見利則趨見便則奪更說甚麼正如貧而無諂富而無驕

與貧而樂富而好禮相似若未能無諂無驕如何說
得樂好禮

子曰我未見好仁者惡不仁者好仁者無以尚之惡不
仁者其為仁矣不使不仁者加乎其身

朱子曰夫子自言未見好仁者惡不仁者蓋好仁者
真知仁之可好故天下之物無以加之惡不仁者真
知不仁之可惡故其所以為仁者必能絕去不仁之
事而不使少有及於其身此皆成德之事故難得而

見之也

有能一日用其力於仁矣乎我未見力不足者

言好仁惡不仁者雖不可見然或有人果能一旦奮然用力於仁則我又未見其力有不足者蓋為仁由已欲之則是而志之所至氣必至焉故仁雖難能而至之亦易也

蓋有之矣我未之見也

蓋疑詞謂有用力而力不足者蓋人之氣質不同故

疑亦容或有此昏弱之甚欲進而不能者但我偶未
之見耳蓋不敢終以為易而又歎夫人之莫肯用力
於仁也○此章言人之成德雖難其人然學者苟能
實用其力則亦無不可至之理但用力而不至者今
亦未見其人焉此夫子所以反覆而歎惜之也○或
問無以尚之之義如何曰李氏曰好仁如好色舉天
下之物無有以尚之若有以尚之則其好可移矣曰
為仁者亦用力乎曰蘇氏言之矣蘇氏曰仁之可好

甚於美色不仁之可惡甚於惡臭而人終不知所趨
避者物有以蔽塞之也解其蔽達其塞不用力可乎
故曰自勝者強又曰克己復禮為仁○問好仁者不
幾於安乎曰未也好仁惡不仁皆利仁之事○問有
能一日用其力曰此心散漫放肆一聳動時便在這
裏雖曰用力却不大段用力○問集註云云曰須是
立志為先這氣便隨他志如大將指揮一出三軍皆
隨若能立志氣皆由我使人之所以萎靡柔弱只是

志不立志立氣便生若真箇要求仁豈患力不足有
引范氏曰惡不仁者不若好仁之為美又援呂氏說
以為惡不仁者劣於好仁曰好仁惡不仁不必分優
劣聖人謂好仁者無以尚之非以好仁者不可過也
謂人之好仁如好好色更無以尚之者此誠於好仁
者也其曰惡不仁者其為仁矣不使不仁者加乎其
身者惡不仁如惡惡臭惟恐惡臭之及吾身此誠於
惡不仁者也○南軒曰既曰有能一日用其力於仁

矣乎我未見力不足者又曰蓋有之矣我未之見也
所以待天下與勉學者之意反復抑揚可謂弘大而
深切矣愚按南軒之說謂蓋有用力於仁者但我偶
未之見耳似得聖人忠厚之意更詳之

子曰人之過也各於其黨觀過斯知仁矣

朱子曰黨類也程子曰人之過也各於其類君子常
失於厚小人常失於薄君子過於愛小人過於忍尹
氏曰於此觀之則人之仁不仁可知矣。吳氏曰後

漢吳祐謂掾以親故受汙辱之名所謂觀過知仁是也按此亦但言人雖有過猶可即此而知其厚薄非謂必俟其有過而後賢否可知也○或問觀過之說曰劉氏之說亦善曰周公使管叔監殷而管叔以殷畔魯昭公實不知禮而孔子以為知禮實過也然周公愛其兄孔子厚其君乃所以為仁也○所謂君子過於厚與愛者雖然是過然其血脉猶是從仁中來小人之過於薄與忍便是失其本心矣又曰厚與愛

畢竟從仁上發來其血脉可見。禮記謂仁者之過易辭仁者之過只是事上差錯故易說不仁之過是有私意故難說此亦觀過知仁意。聖人之言寬舒無所偏失如云觀過斯知仁矣猶曰觀君子之過斯固仁之所存也若於此而欲求仁之體則失聖人過幸人知意與人同過之言說得太巧失於迫切。問南軒闕以黨為偏其說以為偏者過之所由生也觀者詳視之謂今君子之偏在是從而觀之則仁

可識矣此說如何先生不

闕

南軒語說

今本與朱子集註畧同又荅學者問

闕

說乃見前說甚有病來說云云大似釋氏講學不可老草蓋過須是子細玩味方見聖人當時立言意思過於厚者謂之仁則不可然心之不遠者可知比夫過於薄甚至於為忤為忍者其相去不亦遠乎請用此意體認乃見仁之所以為仁之義不至渺茫恍惚矣詳此則韋齋記之云非其定論也

或曰雍也仁而不佞子曰焉用佞禦人以口給屢憎於人不知其人焉用佞

朱子曰佞口才也仲弓為人厚重簡默而時人以佞為賢故美其優於德而病其短於才也佞人以口取辨而無情實徒多為人憎惡耳我雖未知仲弓之仁然其不佞乃所以為賢不足以為病也○或疑仲弓之賢而夫子不許其仁何也曰仁道至大非全體而不息者不足以當之如顏子亞聖猶不能無違於三

月之後况仲弓雖賢未及顏子聖人固不得而輕許之也○所謂全體不息者此心具十全道理若只見得九分亦不是全體所以息者是私欲間之無一毫私欲方是不息○黃氏曰集注於為仁之本言仁而斷之曰仁者愛之理心之德深味六字之義則仁之道無餘蘊矣至此言盡仁之道而又斷之曰非全體而不息者不足以當之深味全體不息四字則學者而求至於仁其至之標的又昭然而可見矣前後十

字之約而仁之道有前輩諸儒累十百言言而莫能究者非深造而實體者何足以知之其發前賢之未發而有功於後學大矣學者不可不深思也或曰集註於令尹子文陳文子章引師說曰當理而無私心與此章所謂全體而不息者有以異乎曰以後章當理無私心之五字較之此章之言則此章全體二字已足以該後章五字之義加以不息二字則又後章未盡之旨故後章雖引師說以為據而或問之中

乃曰仁者心之德而天之理也自非至誠盡性通貫全體如天地一元之氣化育流行無少間息不足以名之亦足以見前說之義尤詳且密也○愚按集義程子曰佞辯才也人有之則多入於不善故夫子云焉用佞范氏曰佞口才也時人以為賢故謂雍也仁而不佞夫子亦惟好仁而惡佞佞者不必能行也仁者不必能言也故佞則不仁仁則不佞多言而尚口取憎之道也尹氏曰雍也仁矣或疑其不佞子謂既

仁矣惡所用佞因言佞者禦人以口給屢為人所憎
仁者安所用之乎諸說皆以不知其仁指佞者而言
與朱子說異當詳之

孟武伯問子路仁乎子曰不知也

朱子曰子路之於仁蓋日月至焉者或在或在或亡不能
必其有無故以不知告之

又問子曰由也千乘之國可使治其賦也不知其仁也
求也何如子曰求也千室之邑百乘之家可使為之宰

也不知其仁也赤也何如子曰赤也束帶立於朝可使與賓客言也不知其仁也

或問諸說有併與三子之才而不之取以為習衰世仕於諸侯大夫之事而不能有以自樂者何如曰治賦為宰與賓客言皆有國家者所不可廢之事雖當隆盛之時仕天子之朝亦豈能一無事於此而直以從容風議為高哉元祐議論意趣多類此此所以墮於一偏之見也○問雖全體未是仁苟於一事上能

當理而無私心亦可謂之一事之仁否曰才說仁便用以全體言若一事能盡仁便是他全體是仁若全體有虧這一事必不能盡仁才說箇仁便包盡許多事無不當理而無私者所以三子當不得聖人只許其才○渾然天理便是仁一毫私意便不是仁

子張問曰令尹子文三仕為令尹無喜色三已之無愠色舊令尹之政必以告新令尹何如子曰忠矣曰仁矣乎曰未知焉得仁

朱子曰令尹官名楚上卿執政者也子文姓鬬名穀於菟其為人也喜怒不形物我無間知有其國而不知有其身其忠盛矣故子張疑其仁然其所以三仕三已而告新令尹者未知其皆出於天理而無人欲之私也是以夫子但許其忠而未許其仁也

崔子弑齊君陳文子有馬十乘棄而違之至於他邦則曰猶吾大夫崔子也違之之一邦則又曰猶吾大夫崔子也違之何如子曰清矣曰仁矣乎曰未知焉得仁

崔子齊大夫名杼齊君莊公名光陳文子亦齊大夫
名須無十乘四匹也違去也文子潔身去亂可謂
清矣然未知其心果見義理之當然而能脫然無所
累乎抑不得已於利害之私而猶未免於怨悔也故
夫子特許其清而不許其仁○愚聞之師曰當理而
無私心則仁矣今以是而觀二子之事雖其制行之
高若不可及然皆未有以見其必當於理而真無私
心也子張未識仁體而悅於苟難遂以小者信其大

者夫子之不許也宜哉讀者於此更以上章不知其仁後篇仁則吾不知之語并與三仁夷齊之事觀之則彼此交盡而仁之為義可識矣今以他書考之子文之相楚所謀者無非僭王猾夏之事文子之仕齊既失正君討賊之義又不數歲而復反於齊焉則其不仁亦可見矣

子曰回也其心三月不違仁其餘則日月至焉而已矣
朱子曰三月言其久仁者心之德心不違仁者無私

欲而有其德也。日月至焉者，或日一至焉，或月一至焉，能造其域而不能久也。○程子曰：三月天道小變之節，言其久也。過此則聖人矣，不違仁只是無纖毫私欲。少有私欲，便是不仁。尹氏曰：此顏子於聖人未達一間者也。若聖人則渾然無間斷矣。張子曰：始學之要當知三月不違與日月至焉內外賓主之辨，使心意勉循循而不能已，過此幾非在我者。○或問仁人心也，則心與仁宜一矣，而又曰心不違仁，則心

之與仁又若二焉者何也曰孟子之言非以仁訓心也蓋以仁為心之德也人有是心則有是德矣然私欲亂之則或有是心而不能有是德此衆人之心所以每至於違仁也克己復禮私欲不萌則即是心而是德存焉此顏子之心所以不違於仁也故所謂違仁者非有兩物而相去也所謂不違者非有兩物而相依也深體而默識於言意之表則庶乎其得之矣曰其以三月期何也曰顏子之於仁熟矣然以其猶

有待於不違而後一也是以至於踰時之久而或不
能無念慮之差焉然其復不遠則其心之本然者又
未嘗有所失也向使假之年大而化之則其心與仁
無待於不違而常一又豈復可以三月期哉張子內
外賓主之辨蓋曰不違者仁在內而我為主也日月
至仁仁在外而我為客也誠知此辨則其不安於客
而求為主於內必矣故曰使心意勉循循而不能
已也其曰過此幾非在我者則豈以用功至此而極

矣過此以往則必德盛仁熟而自至而非吾力之所
能與也與○又程子曰日月至焉與久而不息者所
見規模雖畧相似而其氣味意象迥然有別須心潛
默識玩索久之而後自得朱子曰非其身親而實有
之亦豈能發明至此耶仁與心本是一物才被私欲
一隔便與仁相違却成二物若私欲既無則心與仁
不相離便合成一物○心猶鏡仁猶鏡之明鏡本來
明被塵一蔽便不明若塵垢去則鏡明矣顏子是三

月之久無塵垢其餘或日一次無塵垢少間又暗或月一次無塵垢餘日皆暗亦不可知○三月只是言久爾非謂三月後必違也○如不貳過過便是違仁○問不知其仁註云云曰不是三月以後一向差去但其於這道理久後須畧間斷若無些子間斷便是天理便是聖人○顏子一似主人長在家裏三月而後或有出去時節便會回歸其餘是賓或一日一至或一月一至在內之日多即是主在內之日少即

是客此即內外賓主之辨。○問張子云云曰學者只
要勉勉循循而不能已故能如此後面雖不大段著
力也自做去如推車相似得轉動便滔滔自行不待
著力而自不能已。○過此幾非在我謂過三月不違
非工夫所能及如末由也已真是著力不得又曰幾
非在我如易傳中說過此以往未之或知之意。○問
回心三月不違仁先生曰如何是心如何是仁對曰
心是知覺底仁是理先生曰耳無有不聰目無有不

明心無有不仁然耳有時不聰目有時不明心有時
不仁問莫是心與理合而為一否曰不是合心自是
仁然私欲一動便不仁○三月不違之違猶白中之
黑日月至焉之至猶黑中之白○南軒曰人具生道
以生其心未有不仁者也一毫私欲萌於中則違於
仁矣惟不遠而復者私欲不萌故其仁無時而不存
焉三月言其久而熟也而猶不違焉未若聖人之渾
然無間也日月至焉與三月不違者固亦異矣然非

見道明而用力堅亦未易日月至也由是而不已焉
則亦可馴致矣○黃氏曰心不違仁則心與仁二仁
人心也則心與仁一二說不同而集注乃合而言之
其義精矣或曰張子曰合性與知覺有心之名故心
之為義有專指知覺而言者心不違仁是也有合性
與知覺而言者仁人心是也張子言內外賓主或問
以為日月至焉仁在外三月不違仁在內或曰仁非
有內外也孟子曰仁人之安宅也言仁之理如至安

之宅也譬之三月不違則心為主在仁之內如身為
主在宅之內也日月至焉則心為賓在仁之外如身
為賓在宅之外也此兩義者與集註少異姑存之以
備參考

子曰志於道

朱子曰志者心之所之之謂道則人倫日用之間所
當行者是也知此而心必之焉則所適者正而無他
歧之惑矣

據於德

據者執守之意德則行道而有得於心者也得之於心而守之不失則終始惟一而有日新之功矣

依於仁

依者不違之謂仁則私欲盡去而心德之全也功夫至此而無終食之違則存養之熟無適而非天理之流行矣

游於藝

游者玩物適情之謂藝則禮樂之文射御書數之法
皆至理所寓而日用之不可闕者也朝夕游焉以博
其義理之趣則應務有餘而心亦無所放矣○此章
言人之為學當如是也蓋學莫先於立志志道則心
存於正而不他據德則道得於心而不失依仁則德
性常用而物欲不行游藝則小物不遺而動息有養
學者於此有以不失其先後之序輕重之倫焉則本
末兼該內外交養日用之間無少間隙而涵養從容

忽不自知其入於聖賢之域矣。○志於道方有志焉。據於德一言一行之謹亦是德依於仁仁是衆善總會處。○志謂至誠懇惻念念不忘道者日用當然之理。○德者得之於身也既得之守不定亦會失了。須是據守方得。○德者吾之所自有非自外而得也。以仁義禮智觀之可見韓退之云德足乎已無待於外說得也好。○這處先要就志於道上理會這是個生死路頭如得此路是了只管向此路念念不忘處已

也在是接人也 在是講論也 在是思索也 在是令人
把捉不定 一出 一入 或東 或西 以夫子大聖 猶且從
志學 做來 今要做工夫 須看聖人志於學處 是如何
這處 見得 定後 節節 有下工夫 處 據於德 德者 得也
便是 我自 得底 不是 徒恁地 知得 若徒 知得 不能得
之於 已 似說 別人 底 於已 何干 預如 事親 能孝 便是
我得 這孝 事君 能忠 便是 我得 這忠 說到 德 便是 成
就 這道 方可 有據 處 但據 於德 固是 有得 於心 然亦

恐怕有走作時節其所存主處須是依於仁到游藝
雖似非所急然亦少不得所以助其存主也○志於
道方是要去做事親欲盡其孝事兄欲盡其弟至於
據於德則事親能盡其孝事兄能盡其弟已有可據
底地位依於仁則自朝至暮此心無不在這裏這許
多德總攝貫穿都活了然藝亦不可不去理會如禮
樂射御書數一件理會不得此心便覺滯礙惟是一
去理會這道理脉絡方始一一流通又却養得這

个道理以此知大則道無不包小則道無不入小大
精粗皆無滲漏都是做工夫處故曰語大天下莫能
載語小天下莫能破○仁者人之本心也依如依乎
中庸之依相依而不捨之之意如所謂君子無終食
之間違仁是也○藝是小學工夫若論先後則藝為
先而三者為後若論本末則三者其本而藝其末文
中子說志道據德依仁而後藝可游此說得自好○
志道至依仁一節密似一節志於道則心心念念惟

在人倫日用之所當行者決不向利欲邊去其志定矣據於德如孝親弟長等事皆吾之所自得而行之者慮有照管不到時節當據守之而弗失則吾之所得者實矣依於仁則全其本心之德而不間於人欲之私生生之體自然流行不息工夫至此亦云熟矣此三節自立脚大綱以至工夫精察如此游於藝是行有餘力則以學文之意未知是否先生曰然

宰我問曰仁者雖告之曰井有仁焉其從之也子曰何

為其然也君子可逝也不可陷也可欺也不可罔也

朱子曰劉聘君云有仁之仁當作人今從之從謂從之於井而救之也宰我信道不篤而憂為仁之陷害故有此問逝謂使之往救陷謂陷之於井欺謂誑之以理之所有罔謂昧之以理之所無蓋身在井上乃可以救井中之人若從之於井則不復能救之矣此理甚明人所易曉仁者雖切於救人而不私其身然不應如此之愚也○南軒曰宰我發此問亦不可不

謂之切問也謂仁者惟知求仁而患難有所不恤也
夫子之所以告之者理則無不盡矣蓋其可逝可欺
者惻隱之形不逆詐不億不信也而其不可陷不可
罔者理不可昧故也於此亦可以究仁者之心也

冉有曰夫子為衛君乎子貢曰諾吾將問之入曰伯夷
叔齊何人也曰古之賢人也曰怨乎曰求仁而得仁又
何怨出曰夫子不為也

朱子曰君子居是邦不非其大夫况其君乎故子貢

不斥衛君而以夷齊為問夫子告之如此則其不為
衛君可知矣蓋伯夷以父命為尊叔齊以天倫為重
其遜國也皆求所以合乎天理之正而即乎人心之
安既而各得其志焉則視棄其國猶敝屣爾何怨之
有若衛輒之據國拒父而惟恐失之其不可同年而
語明矣○程子曰伯夷叔齊遜國而逃諫伐而餓終
無怨悔夫子以為賢故知其不與輒也○論子貢問
衛君事曰若使當時子貢往問輒事不唯夫子未必

答便答亦不能盡若一問便止亦未見分明再問怨乎便見得子貢善問纔說道求仁而得仁又何怨便見得夷齊兄弟所處無非天理蒯輒父子所向無非人欲二者相去天淵矣○問子貢欲知為衛君何故問夷齊怨不怨曰一是兄弟遜國一是父子爭國此是則彼非可知○孔子論伯夷謂求仁得仁又何怨司馬子長作伯夷傳但見得伯夷滿身是怨蘇子由伯夷論却好○按蘇氏曰伯夷叔齊之出也父子之

間必有間言焉而能脫身以遠於亂安於喪亡不以
舊惡為怨故凡言伯夷之不怨以讓國言之也○問
蘇氏間言之說果可據乎先生曰伯夷既長且賢其
父無故舍之而立叔齊此必有故故蘇氏疑之觀子
貢問怨乎之義似或有此意然聖賢之心志於求仁
便有甚死讎亦消融了何怨之有○南軒曰叔齊之
讓伯夷以為伯夷之長當立無兄弟之義而何以為
國乎伯夷之不受國以為叔齊之立父命也無父子

之義而何以為國乎之二人者寧去國而存此矣衛
輒之事國人以為蒯瞶既得罪於先君而出奔而輒
受先君之命宗國不可以無主則立輒而拒蒯瞶可
也曾不思蒯瞶父也輒子也父子之義先亡矣國其
可一日立乎在輒之分寧委國而全其父子可也故
子貢以夷齊之事為問方是時夫子在衛輒立之事
蓋難言也賜也微其詞以測聖人之旨可謂善為辭
者矣中有所悔恨皆謂之怨其曰怨乎者謂二子者

委國而去獨不顧其宗國而有所不足於中乎夫子告之以求仁而得仁謂二人者求夫天理之安而已夫豈利害之計乎明乎此而後知古人所以處身謀國之宜矣

子曰仁遠乎哉我欲仁斯仁至矣

朱子曰仁者心之德非在外也故而不求故有以為遠者反而求之則即此而在矣夫豈遠哉○程子曰為仁由己欲之則至何遠之有○問斯仁至矣云云

曰昔者亡之今忽在此如自外而至耳如易言來復
實非自外而來也○南軒曰不曰至於仁而曰斯仁
至矣蓋仁非有方所可以往至也欲仁而仁至我固
有之矣

曾子曰士不可以不弘毅任重而道遠

朱子曰弘寬廣也毅強忍也非弘不能勝其重非毅
無以致其遠

仁以為己任不亦重乎死而後已不亦遠乎

仁者人心之全德而必欲以身體而力行之可謂重矣。一息尚存此志不容少懈可謂遠矣。○程子曰：弘而不毅則無規矩而難立毅而不弘則隘陋而無以居之。又曰：弘大剛毅然後能勝重任而遠到。又曰：顏子弘且毅。孟子毅勝弘。○西銘言弘之道。○重擔子須硬脊。漢方擔得。○朱子曰：弘雖只是寬廣若只把做度量寬容看便不得。此弘字便是執德不弘之弘。謂如人有許多道理及至學來下梢却做得狹窄了。

便是不弘蓋緣只以己為是他人之言雖善亦不信
如此狹小何緣得弘須是凡人之善皆有以受之集
衆善之謂弘問是寬以居之否曰然如人能弘道是
以弘為開擴却是作用○弘是事事着得道理也着
得事物也着得順來也着得逆來也着得富貴也着
得貧賤也着得○所謂弘者不但是容受得人須容
受得許多衆理若執着一見便自以為是他說更入
不得便是滯於一隅如何得弘如何勝得重任問弘

是心之體毅是心之力曰心體是多大而天地之理纔思量便在這裡若是世上淺心底人有一兩件事便着不得○毅是立腳處堅忍強厲擔負得去底意思○弘是無所不容心裏無足時不說我德已如此便住如無底之谷擲一物於中無有窮盡時若有滿足之心便不是弘毅是忍耐持守着力去做○道理自是个大底物事無所不包若小着這心如何承載得起弘了却要毅弘則都包得在裏又須分別

是非有規矩始得○弘是事事着得如進學也要弘接物也要弘事事要弘若不弘只見得這一邊不見那一邊只得些小便自足毅是發處勇猛行得來強忍毅是弘之發用處○曾子之學大抵如孟子之勇觀此章與臨大事不可奪與彼富吾仁之說則其勇可知若不勇如何主張得住

子罕言利與命與仁

朱子曰罕少也程子曰計利則害義命之理微仁之

道大故夫子罕言之。○問夫子與門人言仁多矣而曰罕言何也。曰夫子與門人答問其言不勝其多而言仁尤其切要者故門人備記之而所記止於此則亦可謂之罕言矣。况所言之仁亦不過泛及為仁之事至於仁之本體則未嘗直指以告人也。○仁者性之德也。然必忠信篤敬克己復禮然後能至。若多言仁則學者憑虛躡等而反害於仁矣。○罕言仁者恐人輕易看了不知切己上做工夫。○南軒曰所謂命

與仁者凡夫子之所言何莫非此理而何隱乎爾也
在學者潛心如何耳然夫子未嘗指言也謂之罕亦
可矣

顏淵問仁子曰克己復禮為仁一日克己復禮天下歸
仁焉為仁由己而由人乎哉

朱子曰仁者本心之全德克勝也己謂身之私欲也
復反也禮者天理之節文也為仁者所以全其心之
德也蓋心之全德莫非天理而亦不能不壞於人欲

故為仁者必有以勝私欲而復於禮則事皆天理而
本心之德復全於我矣歸猶與也又言一日克己復
禮則天下之人皆與其仁極言其效之甚速而至大
也又言為仁由己而非他人所能預又見其幾之在
我而無難也日日克之不以為難則私欲淨盡天理
流行而仁不可勝用矣程子曰非禮處便是私意既
是私意如何得仁須是克盡己私皆歸於禮方始是
仁又曰克己復禮則事事皆仁故曰天下歸仁謝氏

曰克己須從性偏難克處克將去

顏淵曰請問其目子曰非禮勿視非禮勿聽非禮勿言非禮勿動顏淵曰回雖不敏請事斯語矣

目條件也顏淵聞夫子之言則於天理人欲之際已判然矣故不復有所疑問而直請其條目也非禮者己之私也勿者禁止之辭是人心之所以為主而勝私復禮之機也私勝則動容周旋無不中禮而日用之間莫非天理之流行矣事如事事之事請事斯語

顏子默識其理又自知其力有以勝之故直以為己任而不疑也。○程子曰顏淵問克己復禮之日子曰非禮勿視非禮勿聽非禮勿言非禮勿動四者身之用也由乎中而應乎外制於外所以養其中也顏淵事斯語所以進於聖人後之學聖人者宜服膺而勿失也因箴以自警其視箴曰心兮本虛應物無迹操之有要視為之則蔽交於前其中則遷制之於外以安其內克己復禮久而誠矣其聽箴曰人有秉彝本

乎天性知誘物化遂亡其正卓彼先覺知止有定閑
邪存誠非禮勿聽其言箴曰人心之動因言以宣發
禁躁妄內斯靜專矧是樞機興戎出好吉凶榮辱惟
其所召傷易則誕傷煩則支已肆物忤出悖來違非
法不道欽哉訓辭其動箴曰哲人知幾誠之於思志
士勵行守之於為順理則裕從欲惟危造次克念戰
兢自持習與性成聖賢同歸○按此章問答乃傳授
心法切要之言非至明不能察其幾非至健不能致

其決故惟顏子得聞之而凡學者不可以不勉也程
子之箴發明親切學者尤宜深玩○或問顏淵問仁
而夫子告之以此何也曰人受天地之中以生而仁
義禮智之性具於其心仁雖專主於愛而實為心體
之全德禮則專主於敬而實天理之節文也然人有
是身則耳目口體之間不能無私欲之累以違於禮
而害夫仁則自其一身莫適為主而事物之間顛倒
錯亂蓋無所不至矣此聖門之學所以汲汲於求仁

而顏子之問夫子特以克己復禮告之蓋欲其克去
有己之私欲而復於天理之本然則夫本心之全德
將不離乎此而無不盡也然人特患於不為耳誠能
一旦用力於此則本心之全德在我而天下之善將
無不由是而出天下雖大亦孰有不與其仁者乎然
己者人欲之私也禮者天理之公也一心之中二者
不容並立而其相去之間不能以毫髮出乎此則入
乎彼出乎彼則入於此矣是其克與不克復與不復

如手反復如背屈伸誠欲為之其機固亦在我而已
夫豈他人之所得與哉顏子之質幾於聖人故其問
仁夫子告之獨為切要而詳盡耳曰然則顏子請問
其目而夫子告以四勿之云何也曰顏子聞夫子克
己復禮之言蓋已洞然默識仁之為體矣然夫子所
謂克己復禮者必有條目而後可以從事於其間也
故復問以審之而夫子以此告之也蓋禮為天理之
節文而其用無所不在以身而言則視聽言動四者

足以該之矣四者之間由粗而精由小而大所當為者皆禮也所不當為者皆非禮也禮即天之理也非禮則己之私也於是四者謹而察之知其非禮而勿以止焉則是克己之私而復於禮矣且非禮而勿視聽者防其自外入而動於內者也非禮而勿言動者謹其自內出而接於外者也内外交進為仁之功不遺餘力矣顏子於是請事斯語而力行之所以三月不違而卒進乎聖人之域也然熟味聖言以求顏子

之所用力其機特在勿與不勿之間而已自是而反則為天理自是而流則為人欲自是而克念則為聖自是而固念則為狂特在毫忽之間耳學者可不謹其所擇哉○顏子平生只是受用克己復禮四箇字○顏子克己如紅爐上一點雪○克己如誓不與賊俱生克伐怨欲不行如薄伐玁狁至於太原逐出境而已或曰克己是勝己之私之謂克否曰然○或問克己之私有三氣稟物欲人我是也不知那個是夫

子所指者曰三者皆在裏然非禮勿視聽言動則耳目口體之欲較多○又問克者勝也不如以克訓治較穩先生曰治字緩只減得一二分也是治○聖人所以下个克字譬如相殺相似定要克勝了方位○禮是自家本有底所以說箇復不是待克了己方去復禮克得那一分人欲去便復得這一分天理來克得二分己私去便復得二分禮來○問克己復禮疑若克己後便己是仁不知復禮還又是一重工夫否

曰己與禮對立克去己後必復於禮然後為仁若克去己私便無一事則克之後須落空去也且如坐當如尸立當如齋此禮也坐而箕踞立而跛倚此己私也克去己私則不容箕踞而跛倚然必如尸如齋方合禮○問克齋記云克己者所以復禮非克己之外別有所謂復禮之功如何先生曰便是當時說得太快了明道先生謂克己則私心去自能復禮便是實○問一日克己復禮如何天下便歸仁曰若真能一

日克己復禮則天下有歸仁之理這處亦如在家無怨在邦無怨意思在家無怨一家歸其仁在邦無怨一邦歸其仁告仲弓者止於邦家顏子則以其極者告之問所以謂之禮而不謂之理者莫是禮便有準則有着實處否先生曰只說理恐虛了這箇禮是那天理節文教人有準則處又曰惟其使此禮字便有檢束之意若只說天理便泛了又曰所以頓着這禮字時便有規矩準繩可見○非禮勿視說文謂勿字

似旗脚此旗一麾三軍盡退工夫只在勿上纔見非
理來則以勿字禁止之纔禁止便克去纔克去便能
復禮○問非禮勿視聽言動者來都在視上先生曰
不專在視上聽亦然緣有視聽便引惹得言動所以
先說視聽後說言動坐間舉佛家亦有克己底話先
生曰所以不可行者却無復禮一段事既克己若不
復禮如何得問聖人言仁處如克己復禮一句最是
得仁之全體否曰聖人告人如居處恭執事敬與人

忠之類無非言仁若見得時何處不是全體何嘗見
有半體仁但克己復禮一句尤親切爾○問集注謂
天下皆與其仁後却載伊川語謂事事皆仁恰似兩
般如何曰惟其事事皆仁所以天下歸仁○問事事
皆仁曰人能克己則日間所行事皆無私意而合天
理耳○問謝氏說克己須從性偏難克處克將去此
性是氣質之性否曰然然亦無難易凡氣質之偏處
皆須從頭克去○問程子謂制之於外以安其內却

是與克伐怨欲不行底相似先生曰克己工夫其初如何便會自然也須禁制始得到養得熟後便私意自漸漸消磨去今人須要簡易處做却不知若不自難處入如何得到易處○問視聽之間或明知其不當視而自接乎目明知其不當聽而自接乎耳奈何曰視與見不同聽與聞不同如非禮之色自過乎目自家不可有要視之之心非禮之聲自過乎耳自家不可有要聽之之心然這處是也難古人於此亦有

以禦之如云姦聲亂色不留聰明淫樂慝禮不接心術○動箴云云曰思是動於內為是動於外蓋思於內不可不誠為於外不可不守然專誠於思而不守於為不可專守於為而不誠於思亦不可○思是動之微為是動之著○克己復禮為仁是做得這工夫到這地位便是仁上蔡却說知仁識仁煞有病○問或問中論克己銘之非如何曰克己之己未是對人物言呂與叔遂謂己既不正物我並觀則雖天下之

大莫不在吾仁之中說得來恁地大故人皆喜其快
殊不知未是如此曰如此則與叔之意與下文克己
之目全不干涉此只是自修之事未道着外面在先
生曰須是恁地思之且道視聽言動干人甚事○問
天下歸仁先生曰克己復禮則事事皆是天下之人
聞之見之莫不皆與其為仁也又曰有幾處被前輩
說得來大今收拾不得謂如君子所過者化本只言
君子所居而人自化所存者神本只言所存主處便

神妙橫渠却云性性為能存神物物為能過化上蔡
便道唯其所存者神是以所過者化此等言語人皆
爛熟以為必須如此說纔不如此說便不快意矣○
游定夫以克己復禮與佛理一般只存想此道理而
已若只以想像言克復則與下截非禮勿視四句有
何干涉○克齋記曰性情之德無所不備而一言足
以盡其妙曰仁而已所以求仁者蓋亦多術而一言
足以舉其要曰克己復禮而已蓋仁也者天地所以

生物之心而人物所得以為心者也惟其得夫天地
生物之心以為心是以未發之前四德具焉曰仁義
禮智而仁無不統已發之際四端著焉曰惻隱羞惡
辭讓是非而惻隱之心無所不通此仁之體用所以
涵育渾全周流貫徹專一心之妙而為衆善之長也
然人有是身則有耳目口鼻四肢之欲而或不能無
害夫仁人而不仁則其所以滅天理窮人欲者將無
所不至此君子之學所以汲汲於求仁而求仁之要

亦曰去其所以害仁者而已蓋非禮而視人欲之害
仁也非禮而聽人欲之害仁也非禮而言且動焉人
欲之害仁也知人欲之所以害仁者在是於是乎有
以拔其本塞其原克之而又克之以至於一旦
豁然欲盡而理純則其胸中之所存者無不粹然天
地生物之心而藹乎其若春陽之溫哉默而成之固
無一理之不具而無一物之不該也感而通焉則無
事不得於理而無物之不被其愛矣又曰克復之云

雖若各為二事其實天理人欲相為消長故克己者乃所以復禮而非克己之外別有復禮之功也○南軒曰克盡己私一由於禮斯為仁矣禮者天則之不可踰也其本在於篤敬而發於三千三百之目皆禮也克己復禮者此言克己之至也天下歸仁者無一物之不體無一事之不該也○愚按集注以天下歸仁為天下之人皆與其仁學者蓋多疑之若克齋記所云然而成之固無一理之不具而無一物之不該

感而通焉則無事之不得於理而無物之不被其愛
為得體用之全又日日克之一句亦不若一旦豁然
之云為得聖言之本旨更詳之

仲弓問仁子曰出門如見大賓使民如承大祭己所不
欲勿施於人在邦無怨在家無怨仲弓曰雍雖不敏請
事斯語矣

朱子曰敬以持己恕以及物則私意無所容而心德
全矣內外無怨亦以其效言之使以自考也餘見後

敬恕篇○按克己復禮乾道也主敬行恕坤道也顏
冉之學其高下淺深於此可見然學者誠能從事於
敬恕之間亦將無己之可克矣○或問一章之說曰
修己以敬則私意無所萌矣推己以恕則私意無所
施矣如是則天理流行內外一致而仁在我矣至於
在邦在家而無怨惡於我者則是敬恕之功而仁之
效也夫為仁非以求是效也而并言之蓋將使之以
是自考耳○夫子告顏淵之言非大段剛明者不足

以當之苟惟不然只且就告仲弓處着力告仲弓之
言只是淳和底人皆可守這兩節一似易之乾一似
易之坤聖人於乾說忠信所以進德也修辭立其誠
所以居業也說得煞廣大於坤只說敬以直內義以
方外蓋乾是純剛健之德坤是純和柔之德○一日
克己復禮其剛健勇決一上便做了若所以告仲弓
者是教他平穩做去緩緩地消磨譬如服藥克己是
一服見效敬恕是漸漸醫治○克己復禮如撥亂反

正主敬行恕如持盈守成。○聖人說話隨人淺深克己工夫較難敬恕工夫到後只一般所謂敬則無己可克克己是殺賊工夫敬恕是防賊工夫。○問克己復禮何以謂之乾道主敬行恕何以謂之坤道曰乾道奮發而有為坤道靜重而持守。○顏子之於仁如天旋地轉雷動風行仲弓則斂藏嚴謹做將去伊川曰質美者明得盡查滓便渾化却與天地同體其次惟莊敬以持養之顏子則明得盡者也仲弓則莊敬

特養之者也。○先立於敬然後能行其恕

司馬牛問仁子曰仁者其言也訥

朱子曰訥忍也難也仁者心存而不放故其言若有所忍而不易發蓋其德之一端也夫子以牛多言而躁故告之以此使其於此而謹之則所以為仁之方不外是矣

曰其言也訥斯謂之仁矣乎子曰為之難言之得無訥乎

牛意仁道至大不但如夫子之所言故夫子又告之
以此蓋心常存故事不苟事不苟故其言自有不得
而易者非強閉之而不出也○程子曰雖為司馬牛
多言故及此然聖人之言亦止此為是愚謂牛之為
人如此若不告之以其病之所切而况以為仁之大
概語之則以彼之躁必不能深思以去其病而終無
自以入德矣故其告之如此蓋聖人之言雖有高下
大小之不同然其切於學者之身而皆為人德之要

則又初不異也只看說話容易底人便是心放了不
仁者不識痛癢得說便說如人夢寐中語○謹言不
妄發即求仁之端○仁者之言自然訥學仁者當謹
言語以操持此心○南軒曰人之易其言也以其未
知用力也知用力則言敢易乎哉故仁者之言必訥
子曰如有王者必世而後仁

朱子曰王者謂聖人受命而興也三十年為一世仁
謂教化浹也○程子曰所謂仁者風移俗易民歸於

仁天下變化之時此非積久何以能致其曰必世理則然也欲民皆仁非必世安可又曰所謂仁者以天理流行融液洞澈而無一物之不體也舉一世而言固無一人不然即一人而言而又無一事之不然求之詩書惟成康之世為足以當之○南軒曰使民皆由於仁非仁心涵養之深仁政薰陶之久莫能然也樊遲問仁子曰居處恭執事敬與人忠雖之夷狄不可棄也

胡氏曰樊遲問仁者三此最先先難次之愛人其最
後乎餘見敬篇○朱子曰聖門教人多以數語能使
人自存其心如居處恭之類是也纔恭則心自不放
黃氏曰此章言極平易學者欲體仁以此思之可也
居處指幽獨而言未有事者也執事指應事而言未
涉乎人也與人指接物而言則涉乎人矣能恭敬而
忠則天理常存而人欲不萌又能無適而不然則流
行而無所間斷仁之為道孰外於此

子曰剛毅木訥近仁

程子曰木者質樸訥者遲鈍四者質之近乎仁者也
○楊氏曰剛毅則不屈於物欲木訥則不至於外馳
故近仁○朱氏跋蘇氏剛說曰剛之所以近仁為其
不詘於欲而能有以全其本心之德不待見於治人
然後可知也

憲問克伐怨欲不行焉可以為仁矣子曰可以為難矣
仁則吾不知也

朱子曰此亦原憲以其所能而問也克好勝伐自矜
怨忿恨欲貪欲有是四者而能制之使不得行可謂
難矣仁則天理渾然自無四者之累不行不足以言
之也○程子曰人而無克伐怨欲惟仁者能之有之
而能制其情使不行斯亦難能也謂之仁則未也此
聖人開示之深惜乎憲之不能再問也或曰四者不
行固不得為仁矣然亦豈非所謂克己之事求仁之
方乎曰克去己私以復乎禮則私欲不留而天理之

本然者得矣若但制而不行則是未有拔去病根之意而容其潛藏隱伏於胸中也豈克已求仁之謂哉學者察於二者之間則其所以求仁之功益親切而無滲漏矣○或問程子以為聖人開示之深而原憲不能再問使憲也再問夫子告之宜奈何曰聖人未發之旨夫孰能測之然以程子之意而言則四者之不行亦制其未而不行於外爾若其本則固著之於心而不能去也譬之木焉不去其根則萌蘖之生自

不能已制而不行日力亦不給矣且雖或能制之終身不見於外而其鬱屈不平之意乃鬪進於胸中則夫所謂仁者亦且殫殘蔽害而不能以自存矣必也絕其萌芽蹶其根本不使少有毫髮留於心念之間則於仁也其庶幾乎嗚呼非程子之學之至何足以及此然以為學者苟不能深省而力行之則亦徒為無當之大言而已故雖發之而亦有所不敢盡其言者其旨深矣。問克伐與克己不同先生曰只是箇

出入意克己是入來勝己克伐是外去勝人。問克
伐怨欲不行如何曰此譬如停賊在家豈不為害若
便趕將出去則禍根絕矣然人非特不能克去此害
却有與他打做一片者。問學者用功且能於此不
行亦可先生曰須是克己涵養以敬於其方萌時絕
之若至於克伐怨欲欲其不行只是過得住一旦決
裂大可憂。克己者是從根源上一刀兩斷便斬絕
了更不復萌不行底只是禁制他不要出來他那欲

為之心未嘗忘。○問原憲是合下見得如此已足還是氣昏力弱沒奈何曰是他從來把這箇做好只要得不行便了所以學者須要窮理緣他見得道理未盡便把這箇做仁較之世人沉迷私欲他一切不行已是多少好惟是聖道廣大只恁地不濟事須着進向上去將克伐怨欲都無始得若藏蓄在這裏只是做病。○南軒曰克伐怨欲不行可謂能制其私欲矣然克伐怨欲之根猶在也若夫仁者之心則四者之

病無自而萌焉欲進於是其惟克己乎

子曰君子而不仁者有矣夫未有小人而仁者也

謝氏曰君子志於仁矣然毫忽之間心不在焉則未

免為不仁也○南軒曰斯須之間心不在焉則為不

仁是故君子戰兢是持而惟恐失之也若小人則戕

賊陷溺雖秉彛之端不容盡泯而亦不能以自達也

子路曰桓公殺公子糾召忽死之管仲不死曰未仁乎

朱子曰子路疑管仲忘君事讎忍心害理不得為仁

也

子曰桓公九合諸侯不以兵車管仲之力也如其仁如其仁

不以兵車言不假威力也如其仁言誰如其仁者又再言以深許之蓋管仲雖未得為仁人而其利澤及人則有仁之功矣。或問管仲不死之說曰程子至矣但以薄昭之言證桓公之為兄則荀卿嘗謂桓公殺兄以爭國而其言固出於薄昭之前矣蓋不可以

此證其必然但以春秋公穀所書之文為據而參以
此章之言斷之可也蓋聖人之於人有功則稱其功
有罪則數其罪不以功掩罪亦不以罪掩功今於管
仲但稱其功不言其罪則可見不死之無害於義而
桓公子糾之長少亦從以明矣又下所謂匹夫匹婦
之為諒者正指召忽之於子糾猶石乞於白公耳至
於程子又謂若使管仲所事者正而不死其難則後
雖有大功聖人豈復稱之則愚恐記者之失也蓋曰

不與其事桓公則可曰不稱其功則不可記者豈因
彼言以為此而遂失之也與曰管仲生死之是非決
一時之義爾程子又謂若使管仲不死而無功則是
貪生惜死而不若匹夫匹婦之為諒若未免於先功
而後義且管仲又何以自必其後之有功耶曰召忽
之失在於輔子糾以爭國而不在於死管仲之得在
於九合之功而不在於不死後功固不可期而其在
我者固可必但其得就此功而免於匹夫匹婦之諒

則亦幸而已矣後之君子有不幸而處此者苟自度其無管仲之才是殆不若為召忽之不失其正也此又程子言外之意讀者不可以不察也○范氏以九合為仁之大以死節為義之小是謀利計功之言其害理甚矣若聖人之心果出於此則行一不義殺一不辜而得天下亦何憚而不為之乎謝氏以管仲於子糾君臣之義未正故可以不死亦非也夫仲之可以不死者正以小白兄而子糾弟耳若使糾兄而當

立則齊國之士君臣之義無所逃矣况如管仲策名
委質親北面而君之安得幸其未得入國而死乃托
於君臣之義未正而不死其難哉以召忽為傷勇仲
之不死為徙義而夫子予仲之不死恐亦非聖人之
意也夫子特以忽之功無足稱而其死不為過管仲
之不死亦未害義而其功有足褒耳固非予仲之生
而賤忽之死也○問管仲之心既已不仁何以有仁
者之功曰如漢高祖唐太宗未可謂之仁人然秦隋

殘虐之極二君一旦出而平定天下拯救生民豈非
仁者之功耶管仲之功亦猶是也○南軒曰夫子所
以稱管仲者仁之功也問其仁而獨稱仁之功則其
淺深亦可知矣其告子貢亦然若二子問管仲仁乎
則所以告之者異矣聖人問答抑揚之意學者當深
味之○愚按如其仁如其仁朱子以為誰如其仁或
者以為夫子之意蓋謂如其九合不以兵車之事是
亦仁也蓋指此一事而許其仁此說近是

子貢曰管仲非仁者與桓公殺公子糾不能死又相之
朱子曰子貢意不死猶可又相之則已甚矣

子曰管仲相桓公霸諸侯一匡天下民到於今受其賜
微管仲吾其被髮左衽矣

霸與伯同長也匡正也尊周室攘夷狄皆所以正天
下也微無也衽衣衿也被髮左衽夷狄之俗也

豈若匹夫匹婦之為諒也自經於溝瀆而莫之知也

諒小信也莫之知人不知也。程子曰桓公兄也子

糾弟也仲私於所事輔之以爭國非義也桓公殺之
雖過而糾之死實當仲始與之同謀遂與之同死可
也知輔之爭為不義將自免以圖後功亦可也故聖
人不責其死而稱其功若使桓弟而糾兄管仲所輔
者正桓奪其國而殺之則管仲之與桓不可同世之
讎也若計其後功而與其事桓聖人之言無乃害義
之甚啓萬世反復不忠之亂乎如唐之王珪魏徵不
死建成之難而從太宗可謂害於義矣後雖有功何

足贖哉愚謂管仲有功而無罪故聖人獨稱其功王
魏先有罪而後有功則不以相掩可也

子曰志士仁人無求生以害仁有殺身以成仁

朱子曰志士有志之士仁人則成德之人理當死而
求生則其心有不安矣是害其心之德也當死而死
則心安而德全矣○程子曰實理得之於心自別實
理者實見得是實見得非也古人有捐軀隕命者若
不實見得惡能如此須是實見得生不重於義生不

安於死也故有殺身以成仁者只是成就一箇是而已或問殺身成仁之說曰仁者心之德而萬理具焉一有不合於理則心不能安而害其德矣順此理而不違則身雖可殺而此心之全此理之正浩然充塞於天地之間夫孰得而亡之哉曰其謂殺身成仁而不曰義何也曰仁義體一而用殊故君子之於事有以仁決者有以義決者以仁決者此章之言是也以義決者孟子論欲有甚於生惡有甚於死是也蓋仁

人不以所惡傷所好之體義士不以所賤易所貴之
宜○仁者吾心之正理志士仁人無求生以害仁有
殺身以成仁須知道求生害仁時雖以無道得生却
是挾破了我心中之全理殺身成仁時吾身雖死却
得此理全○學問只要心裏見得分明便從上面做
去如殺身成仁不是自家計較要成仁方死只是見
得生為不安死為安便自殺身旁人見得便說能成
仁此旁人之言非我之心要如此所謂經德不回非

以干祿哭死而哀非為生也若有一毫為人之心便不是了。○南軒曰仁人於理之當然如飢食渴飲也志士謂志於仁者亦能擇而處之矣

子貢問為仁子曰工欲善其事必先利其器居是邦也事其大夫之賢者友其士之仁者

朱子曰賢以事言仁以德言夫子嘗謂子貢悅不若己者故以是告之欲其有所嚴憚切磋以成其德也程子曰子貢問為仁非問仁也故孔子告之以為仁

之資而已。○事賢友仁便是要琢磨勉勵以至於仁如欲克己而未能克己欲復禮而未能復禮須要更相勸勉乃為有益。○南軒曰器利則事善若所事與所友泛而不知擇則其亡焉者不自知矣。

子曰民之於仁也甚於水火水火吾見蹈而死者未見蹈仁而死者也。

朱子曰民之於水火所賴以生不可一日無其於仁也亦然但水火外物而仁在己無水火不過害人之

身而不仁則失其心是仁有甚於水火而尤不可以
一日無者也况水火或有時而殺人仁則未嘗殺人
亦何憚而不為哉李氏曰此夫子勉人為仁之語下
章放此

子曰當仁不讓於師

朱子曰當仁以仁為己任也雖師亦無所遜言當勇
往而必為也蓋仁者人所自有而自為之非有爭也
何遜之有○程子曰為仁在己無所與遜若善名在

外則不可不遜所謂不讓者猶程子所謂不可將第一等事讓與別人做者其事則謂顏子曰舜何人也
有為者亦若是者而已大抵此與上章皆勉人為仁之語然上章為凡民都知仁而憚於為之者發此章為學者粗知仁之為美而不知勇於有為者發各有所當云

子張問仁於孔子孔子曰能行五者於天下為仁矣請問之曰恭寬信敏惠恭則不侮寬則得衆信則人任焉

敏則有功惠則足以使人

朱子曰行是五者則心存而理得矣於天下言無適而不然猶所謂雖之夷狄不可棄者五者之目蓋因子張所不足而言耳任倚仗也又言其效如此○問恭寬信惠固是求仁之方但敏字於仁工夫似不甚親切莫是人之為事求悠悠則此心便間斷多否曰不止是悠悠蓋不敏便有怠忽之意纔怠忽便心不存而間斷多便是不仁也南軒曰能行此五者於天

下則其心公平而周徧可知矣然恭其本歟

微子去之箕子為之奴比干諫而死孔子曰殷有三仁

焉

朱子曰三人之行不同而同出於至誠惻怛之意故
不拂乎愛之理而有以全其心之德也楊氏曰此三
人者各得其本心故同謂之仁。或問三子之心同
出於至誠惻怛則可見矣抑何以知其所處之各適
其可耶曰按史記此事先後皆不同惟殷紀以為微

子先去比干乃諫而死然後箕子佯狂為奴為紂所囚者近是蓋微子帝乙元子當以先王宗祀為重義當早去又決知紂之不可諫也故遂去之而不以為嫌比干少師義當力諫雖知其不可諫而不可已也故遂以諫死而不以為悔箕子見比干之死則知已之不可諫且不忍復死以累其上也見微子之去則知己之不必去且不忍復去以背其君也故佯狂為奴而不以為辱此可以見三仁之所當為易地皆然

矣或以為箕子以天畀九疇未傳而不敢死則其為
說迂矣同謂之仁者以其皆無私而各當理也無私
故得心之體而無違當理故得心之用而不失此其
所以全心之德而謂之仁與曰然則史記三子之事
與夫子言先後不同何也曰史所書者事之實此所
記者以事之難易為先後耳。或問言仁與集注不
同集注者改本也然則或問之說為不當乎黃氏曰
非也先師言仁之義則固以心之德愛之理為主矣

言人之所以至於仁則以無私心而皆當理也仁之為義固該體用而與惻隱對言則仁主於體而未及於用也今日愛之理心之德則於仁之義為最切也然仁曰愛之理而為仁之用仁固心之德而一動一靜亦無非此德之所暨也或問之言指三子之所以至於仁而言也集注之言正指仁之義而言也然其曰不拂乎愛之理而有以全其心之德曰全曰不拂則或問之意亦在其中矣讀者識之可也○南軒曰

三人者皆當其時當其位處之盡其道者也其立紂之朝所以維持宗社之心至矣而有不得已焉則各自靖以獻於先王詳味微子一篇則可見三子之所為深切至到者矣孔氏曰稱其為仁以其至誠惻怛克盡其道故也

子夏曰博學而篤志切問而近思仁在其中矣

朱子曰四者皆學問思辨之事耳未及乎力行而為仁也然從事於此則心不外馳而所存自熟故曰仁

在其中矣。○程子曰博學而篤志切問而近思何以言仁在其中矣學者要思得之了此便是徹上徹下之道又曰學而不博則不能守約志不篤則不能力行切問近思在己者則仁在其中矣又曰近思者以類而推蘇氏曰博學而志不篤則大而無成泛問遠思則勞而無功。○問云云曰此全未是說仁處方是尋討箇求仁門路當從此去漸見效在其中謂有此理耳。○問云云如何謂之仁曰非是便為仁如言行

寡尤悔非所以干祿而祿在其中父子相為隱非直而直在其中博學篤志切問近思未便是仁然學者用力於此仁亦在其中矣問博學與近思亦不相妨否先生曰博學是都要理會過近思是注心着力處博學是箇大規模近思是漸進工夫如大學明明德於天下是大規模其中格物致知誠意正心修身齊家等便是次第處如博學亦豈一日便都學得了亦是漸漸學去曰篤志未說到行處否曰篤志只是至

誠懇切以求之若只管泛濫外面博學更不懇切其志便成放而不知求底心便是頑麻不仁底人惟篤志又切問近思便有歸宿處此心不泛濫走作只在這窠坎裏仁便在其中○問程子云云莫便是先生所謂從事於此則心不外馳而所存自熟之意乎曰然於是四者中見得箇仁底道理便是徹上徹下之道○問以類而推曰節節推將去今人不曾以類而推蓋不曾先理會一件却理會一件若理會得一件

逐件推將去相次亦不難。○問何謂類推曰此語道
得好不要驀越不要陡頓只是就近傍那曉得處挨
將去如這一件理會得透了又因這件推去做那一
件如讀書讀第一段了便推第一段之類去讀第二
段自此以往只管恁地去次第都能理會得若開卷
便要獵一過如何得直卿曰是理會得孝便推去理
會得弟否曰只是傍易曉底挨將去如理會得親親
即類推去仁民仁民是親親之類理會得仁民便推

類去愛物愛物是仁民之類如刑于寡妻便推類去至于兄弟至于兄弟便推類去御于家邦如修身便推類去齊家齊家便推類去治國只是一步了又一步○南軒曰博學篤志切問近思不可便以此為仁而仁不外是也學者從事於此而不計其獲則循序而有至蓋不可以欲速而臆度也聖門論仁大抵如此○黃氏曰云云或曰何以知四者之專主於心之所存而言曰人惟無所用其心則其心泛濫而不一

志之篤則此心常有所定向而不泛濫矣問不切思不近則其所用心皆在吾身之外切問而近思則皆求其在己者而無復外馳之患矣人能盡此四者則雖學問思辨之事而自有以得夫操存涵養之效所以謂仁在其中也

子游曰吾友張也為難能也然而未仁

朱子曰子張行過高而少誠實惻怛之意

曾子曰堂堂乎張也難與並為仁矣

朱子曰堂堂容貌之盛言其務外自高不可輔而為仁亦不能有以輔人之仁也○范氏曰子張外有餘而內不足故門人皆不與其為仁子曰剛毅木訥近仁寧外不足而內有餘庶可以為仁矣○南軒曰雖有高明之見卓絕之行謂之難能則可而不害其為未仁也堂堂氣象所以為難與並仁也歟蓋是道也須深潛緘密親切篤至而後可以進故如愚之顏子聖人許其不違仁而堂堂之張曾子以為難與並為

仁也

子貢曰我不欲人之加諸我也吾亦欲無加諸人子曰
賜也非爾所及也

朱子曰子貢言我所不欲人加於我之事我亦不欲
以此加之於人此仁者之事不待勉強故夫子以為
非子貢所及。程子曰我不欲人之加諸我吾亦欲
無加諸人仁也施諸己而不願亦勿施於人恕也恕
則子貢或能勉之仁則非所及矣。朱子曰此伊川

晚年仁熟方看得如此分曉說得如此明白。無者自然。而然勿者禁止之謂。此所以為仁恕之別。又曰。生底是恕。熟底是仁。勉強底是恕。自然底是仁。有計較有賭當底是恕。無計較無賭當底是仁。南軒曰。此與己所不欲勿施於人。施諸己而不願亦勿施於人同意。然而彼二言者皆為仁之方。恕之道也。故皆有勿辭。若子貢之言不欲人之加於己者。即欲不加諸人是則不待禁止。油然公平。物我一視。仁者之

事也其曰非爾所及者正所以勉其強恕而抑其躐等也。○此章及後章皆兼言仁恕故移置此

子貢曰如有博施於民而能濟衆何如可謂仁乎子曰何事於仁必也聖乎堯舜其猶病諸

朱子曰博廣也仁以理言通乎上下聖以地言則造其極之名也乎者疑而未定之辭病心有所不足也言此何止於仁必也聖人能之乎則雖堯舜之聖其心猶有所不足於此也以是求仁愈難而愈遠矣

夫仁者己欲立而立人己欲達而達人

以己及人仁者之心也於此觀之可以見天理之周流而無間矣狀仁之體莫切於此

能近取譬可謂仁之方也已

譬喻也方術也近取諸身以己所欲譬之他人知其所欲亦猶是也然後推其所欲以及於人則恕之事而仁之術也於此勉焉則有以勝其人欲之私而全其天理之公矣。程子曰醫書以手足痿痺為不仁

此言最善名狀仁者以天地萬物為一體莫非己也
認得為己何所不至若不屬己自與己不相干如手
足之不仁氣已不貫皆不屬己故博施濟眾乃聖人
之功用仁至難言故止曰己欲立而立人己欲達而
達人能近取譬言可謂仁之方也已欲令如是觀仁可
以得仁之體又曰論語言堯舜其猶病諸者二夫博
施者豈非聖人之所欲然必五十乃衣帛七十乃食
肉聖人之心非不欲少者亦衣帛食肉也顧其養有

所不瞻爾此病其施之不博也濟衆者豈非聖人之
所欲然治不過九州聖人非不欲四海之外亦兼濟
也顧其治有所不及爾此病其濟之不衆也推此以
求修己以安百姓則為病可知苟以吾治已足則便
不是聖人呂氏曰子貢有志於仁徒事高遠未知其
方孔子教之以於己取之庶近而可入是乃為仁之
方雖博施濟衆亦由此進○或問博施濟衆必也聖
乎此言必聖人而後能之乎曰不然此正謂雖聖人

亦有所不能爾必也聖乎蓋以起下文堯舜病諸之意猶曰必也射乎而後言射之有爭也曰仁恕之別何也曰凡己之欲即以及人不待推以譬彼而後施之者仁也以己之欲譬之於人知其必欲此而後施之者恕也此其從容勉強固有淺深之不同然其實皆不出乎常人一念之間學者亦反求諸己而足矣豈必博施濟衆務為聖人之所不能者然後得之乎○博施濟衆是無盡底地頭堯舜儘無下手處○仁

通上下但克己私復還天理便是仁何必博施而後
為仁若必待如此則有終身不得仁者矣。子貢比
三問仁聖人三告之以推己度物想得子貢高明於
推己處所未盡。己欲立便立人已欲達便達人
此仁者之事能近取譬此為仁之方今人便以欲立
欲達為能近譬則誤矣。問博施濟眾曰此是仁者
事功若把此為仁則只是中天下而立者才能如此
便都無人做得。問己欲立而立人已欲達而達人

與我不欲人加諸我吾亦欲無加諸人一般都是以
己及物能取譬與己所不欲勿施於人一般都是推
己及物曰然○以己之欲立者而立人以己之欲達
者而達人以己及物無些私意如堯克明俊德以親
九族九族既睦平章百姓百姓昭明協和萬邦黎民
於變時雍以至於欽若昊天歷象日月星辰敬授人
時底道理都擁出來又如周禮一書周公所以立下
許多條貫皆是廣大心中流出○或問此章程子作

一統說先生作二段如何謂分仁恕先生曰某之說即非異於程子蓋程子之說如大屋一般某之說如在大屋下分別廳堂房室初無異也○欲立立人欲達達人正指仁之本體蓋已欲立則思處置他人也立已欲達則思處置他人也達故開眼目推廣心胸其氣象如此安得不謂仁之本體彼子貢所問是就事上說却不就心上說呂氏云雖博施濟衆也須自此始某甚喜其說○南軒曰博施濟衆之義固大然


特以見大功用而非所以明仁也聖亦仁之成名非
謂仁未及乎此也以仁之為道不當如此求也故夫
子既告之以博施濟衆之大而又語之以仁焉仁者
公天下之理而無物我之私故己欲立而立人已欲
達而達人仁者之心也欲進乎是其唯近取譬乎近
取譬者體之於吾心而推之此恕之道也所以為仁
之方也於其方而用力則可以進於仁焉知能近取
譬為仁之方則知以博施濟衆言仁者其亦泛而無

統矣

子貢問曰有一言而可以終身行之者乎子曰其恕乎
己所不欲勿施於人

朱子曰推己及物其施不窮故可以終身行之○尹
氏曰學貴於知要子貢之問可謂知要矣孔子以是
告之求仁之方也推而極之雖聖人之無我不出乎
此終身行之不亦宜乎○問言恕不及忠曰分言忠
恕有忠而後恕獨言恕則忠在其中若不能恕則其

無忠可知恕是忠之發處若無忠做恕不出○此章
專言恕故附於仁恕之後若其他兼言忠恕者悉附
於曾子一貫章



西山讀書記卷六